

Script of Evening Gojri News Bulletin 24 May 2026 at 1700Hrs

ايوننگ گو جری نیوز بلیٹن مورخہ 24 مئی 2026

یوہ آکاشوانی جموں بے عبدالرحمان شاہین تے عبدالمجید تیں خبر سُنو پہلاں خاص خاص خبر۔

Headlines

- *1- لیفٹنٹ گورنر منوج سنہا نے سرینگر مانہ نیشنل انٹیگریشن کیمپ مانہ این سی سی کیڈیٹس ور زور پایو جے وے مُلک غی تعمیر غی کوششاں غی قیادت کریں۔
- *2- بڑی مسافر گڈیاں لاریاں مانہ کالسریاں تے معزور افراد واسطے سیٹ مخصوص کرن نانہ جموں کشمیر سرکار نے لازمی قرار دتوہے۔
- *3- جموں کشمیر غا راجوری ضلع مانہ حفاظتی دستاں تے دہشت گرداں بشکار ہوا اک تصادم غے بعد اُت تلاشی کا روائی تیز کر دتی گئی ہے تے مزید فوجی تعینات کیا گیا ہیں۔
- *4- سری لنکا مانہ منعقدہ 23 ویں ٹینشن کرائے انٹرنیشنل چمپئن شپ مانہ ریا سی ضلع غی جیوتی دیوی نے سونا غو تمغو جت غے جموں کشمیر غو ناں روشن کیو ہے ۔
- *5- تے محکمہ موسمیات نے پہلکیں تک جموں کشمیر غا کُجھ جگہیں ہلکی بارش تے تیز آندھی چکھڑ چُہلن غی پیشنگوئی کی ہے ۔

خبریں غی تفصیل نال پہلاں عبدالرحمان شاہین۔

LG NCC Camp

لیفٹنٹ گورنر منوج سنہا نے اج این سی سی نیشنل انٹیگریشن کیمپ مانہ مُلک پھر تیں آیا وای کیڈیٹس نال خطاب کیو۔ اپنا خطاب مانہ ایل جی سنہا نے ان ور زور پایو جے وے مُلک غی تعمیر مانہ فعال کردار اد اکرین۔ انہاں نے کیمپ نانہ بھارت غی روح غی زندہ علامت قرار دیتاں وائ کہیو جے کیڈیٹس نہ صرف تا ریخ غا گواہ ہیں بلکہ اس گئی تشکیل مانہ مدد کر رہیا ہیں۔ ایل جی نے قومی اتحاد نانہ مضبوط بنان مانہ نوجوانان غی ذمہ داریاں غا بارا مانہ گل کی تے کیڈیٹس غی حوصلہ افزائی کی جے وے نظم و ضبط ، خدمت تے قیادت غا سبق نانہ جاری رکھیا وائ ہیں۔ گل بات مانہ سوال جواب غی نشست وی شامل تھیں تے نوجوانان غی شمولیت تے خُب الوطنی غا اقدامات واسطے انتظامیہ غی حمایت غی تصدیق کی گئی۔ اس موقع ور ایل جی اس طرح کہیو۔۔۔ بائٹ۔۔۔

Tpt. Reserved Seats

جموں کشمیر غا گڈیاں لاریاں بارے محکمہ نے یوٹی پھر مانہ چلن آلی تمام لاریاں مانہ کالسریاں تے خصوصی طور ور معزور افراد واسطے سیٹ مخصوص رکھن نانہ لازمی قرار دیتاں وان سخت ہدایت جاری کیں ہیں۔ ان ہدایات غی خلاف ورزی کرن آلی گڈیاں غا پرمٹ غی معطلی یاہ منسوخی سمیت دوجی سخت کاروائی واسطے خبردار کیو گیو ہے۔ ٹرانسپورٹ محکمہ غا دفتر تیں جاری کیا گیا حکم نامہ غے مطابق بڑی بساں مانہ سیٹ 1 تیں 12 تک تے درمیانی تے منی بساں مانہ 1 تیں 9 توڑی سیٹ کالسریاں تے خاص طور ور معزور افراد واسطے مخصوص رہیں گی۔ تے اس ریزرویشن نانہ لازمی قرار دتو گیو ہے۔

Search Op Rajouri

حفاظتی دستاں نے اتوار غے روز راجوری ضلع مانہ تلاشی آپریشن مزید تیز کر دتو ہے تے مشتبہ دہشت گرداں غی تلاشی واسطے اضافی دستاں غی تعیناتی غے سنگ کپہرہ بندی نانہ مضبوط بنايو، جن غا بارہ مانہ خیال کیوجا رپیو ہے کہ وے علا قہ مانہ چھپیا واہ ہیں۔ دوہری ماہل گھمبیر موغلاں پٹی مانہ آپریشن نانہ اس وقت وسعت دتی گی جد بار غے روز خفیہ اطلاع غی بنیاد ور کیا گیا آپریشن غے دوران حفاظتی دستاں تے دہشت گرداں غے بشکار مختصر جھڑپ ہوئی۔ عہدیداراں غے مطابق دوہری ماہل گھمبیر موغلاں علا قہ مانہ تلاشی آپریشن مزید تیز کر دتا گیا ہیں تے محاصرہ نانہ مضبوط بنايو گیو ہے۔ مشتبہ دہشت گرداں غی تلاش مانہ مدد واسطے اضافی حفاظتی اہلکار وی علا قہ مانہ پجیا ہیں۔

Sunday on Cycles

فٹ انڈیا مو منٹ مہم غے تحت جاری سرگرمیاں غا اک حصہ غے طور ور " سنڈیز آن سائیکلز غا 75 وان شمارہ غو انعقاد اج ریاسی مانہ آئی آر پی۔ 1- بٹالین بیڈ کوارٹر ریاسی غی طرفوں کیو گیو۔ سائیکل ریلی نانہ بٹالین بیڈ کوارٹر ریاسی تیں روانہ کیو گیو۔ جس غو مقصد جسمانی صحت، صحت مند طرز زندگی تے کھیڈاں و فلاحی سرگرمیاں مانہ عوامی شرکت نانہ فروغ دینو ہے۔ اس پروگرام غے ذریعے منشیات غا استعمال غے خلاف اک مضبوط پیغام وی دتو گیو تے نوجواناں نانہ کھیڈاں تے جسمانی سرگرمیاں غے ذریعے صحت مند تے مثبت عادات اپنان غی ترغیب دتی گئی۔ اس بارے بولتاں وان اک منظم نے آکاشوانی نیوز سنگ گل بات کرتاں وان اس راہ کہیو۔ بائٹ۔ اس موقع ور شرکت کرن آلا افراد نے اپنا تاثرات کجھ اس طرح دتا۔ بائٹ۔۔۔

مزید خبراں نال عبدالمجید ور اس تیں پہلاں یوہ سنیو۔

Karate Gold

سری لنکا غا کینڈی مانہ منعقدہ 23 وان ٹینشن کرائے انٹرنیشنل چمپئن شپ مانہ ضلع ریاسی غی بہماگ گا گراں ٹوٹ نیویا غی بسنیک جیوتی دیوی نے سونا غو تمغو جت غے جموں کشمیر غو ناں روشن کیو ہے۔ جیوتی دیوی غی اس خاص حصولیابی واسطے جموں کشمیر پولیس تے ریاسی غا لوکاں نے پولیس تھانہ ریاسی مانہ منعقدہ اک شاندار اعزازی تقریب مانہ جیوتی دیوی غی عزت افزائی کی۔ جیوتی دیوی غے علا وہ ادھمپور ضلع غی لڑکیاں نے وی شاندار کارکردگی غو مظاہرہ کیو تے یاہ ملک واسطے فخر آلی گل ہے۔ مذکورہ بین القوامی چمپئن شپ مانہ 10 ملکاں غا کھلاڑیاں

نے شرکت کی۔ آکاشوانی نال گل کرتانواں جیوتی دیوی نے کہیو۔ بائٹ۔ جد کہ کوچ
کیلاش نے ات گل کرتاں واں اس طرح کہیو۔ بائٹ۔

PM MKB

وزیر اعظم نریندرمودی آئندہ اتواریں 31 مئی نانہہ آکاشوانی ور "من کی بات" پروگرام
مانہہ مُلک تے مُلک تیں باہر رہ رہیا بھا رتیاں نال اپنا خیالات سانجھا کریں گا۔ اس ماہانہ
ریڈیو پروگرام غو یوہ 134 ووں نشریو وے گو۔ لوک مذکورہ پروگرام واسطے اپنا
خیالات تے تجاویز ٹول فری نمبر 1800117800 غے ذریعے بھیج سکیں۔ لوگ نریندرمو
دی ایپ یاہ مائی گوو اوپن فورم یاہ 1922 ور مس کال کرن تیں بعد موصول ہون آلا لنک
ور اپنی تجاویز براہ راست وزیر اعظم نانہہ دے سکیں۔ آئندہ نشریا واسطے تجاویز 29
مئی تک ٹوری جا سکیں۔

Weather

محکمہ موسمیات نے پیشنگوئی کی ہے جے جموں کشمیر مانہہ اج تے پہلکیں ڈیگر تک
کُجھ جگہیں تیز ہوا غے نال ہلکی بارش ہون غو امکان ہے۔ 26 تے 27 مئی نانہہ موسم
عام طور ور خشک رہن غی توقع ہے تے اس دوران جموں صوبہ غی کئی جگہیں شدت
نال گرمی ہے گی۔ 28 تے 29 مئی نانہہ کئی جگہیں گرج چمک تے تیز آندھی چُان نال تیز
بدل برن غو امکان دسیو گیو ہے جد کہ 30 مئی تیں 2 جون تک دوپہر غے بعد کُجھ
جگہیں گرج چمک نال ہلکی بارش ہون گی پیشنگوئی کی گئی ہے۔ اس بارے مزید جانکا
ری دے رہیا ہیں محکمہ موسمیات غا ڈائریکٹر مختار احمد۔ بائٹ۔

Livestock Mandis Poonch

آئندہ ہفتے عید الضحیٰ غے پیش نظر ضلع انتظامیہ پونچھ نے پونچھ مانہہ قربانی واسطے
جانواراں غی خرید و فروخت واسطے منڈی لان غی خاطر چار جگہ مختص کی ہیں تے
خانہ بدوشاں تے بھیڑ بکریں بیچن آلاں واسطے خاص جگہ فراہم کی ہیں۔ بلاک پونچھ غا
ویٹنری اسسٹنٹ سرجن ڈاکٹر گر پریٹ سنگھ نے دسیو ہے جے لوگ ان منڈیاں وچوں
قربانی مانہہ جانواراں غی خرید و فروخت سرکار غی طرفوں جاری کی گئی رہنما
سطور تے منظور شدہ نرخاں غے مطابق ہو رہی ہے۔ اس بارے مزید جانکاری دیتاں
واں ڈاکٹر گر پریٹ سنگھ غو کہنو تھو۔ بائٹ۔

اس غے نال ہی خبراں غو یوہ بلیٹن ختم ہوؤ۔